



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**07 Agostu 2023**

**Membru estrutura suku no comunidade Suku Lalawa, konsidera sistema lista proporsionál iha eleisaun nasionál parlamentár la justu**

Iha 04 Agostu 2023, JSMP organiza no hala'ó treinamentu ba membru estrutura suku no membru comunidade Suku Lalawa, Postu Administrativu Tilomar, Munisípiu Kobalima iha Sede Suku Lalawa. Partisipante sira hamutuk nain 30, kompostu husi mane 15 no feto 15.

Objetivu hosi treinamentu ne'e atu hasa'e koñesimentu lideransa komunitária no membru comunidade sira-nian koñesimentu kona-ba demokrasia, direitu umanu, knaar órgaun soberanu, partisipasaun públiku iha prosesu halo lei no asesu ba justisa formál.

Iha treinamentu ne'e, membru comunidade sira hato'o sira-nia preokupasaun kona-ba sistema proporsionalidade iha eleisaun nasionál parlamentár. Membru comunidade konsidera sistema ne'e la justu tanba iha rezultadu eleisaun mezmuke partidu polítiku ida manan iha munisípiu ida, bele akontese katak munisípiu ne'e laiha nia ema ka reprezentante iha Parlamentu Nasionál tanba ema husi munisípiu ne'e nia número iha lista la tama ka número boot husi número asentu ne'ebé partidu ne'e hetan.

“Sistema lista proporsionál nu'udar mekanizmu ida ne'ebé Governu adota hodi bele fasilita realizasaun no jestaun ba eleisaun nasionál parlamentár nian, mezmu nune'e, Governu la haree didi'ak nia impaktu ka rezultadu ne'ebé hamosu injustisa hanesan preokupasaun comunidade nian ne'e. Ida ne'e, tanba, dala barak rezultadu eleisaun hatudu katak iha munisípiu balun iha partidu ne'ebé nia total número votu konstitui asentu iha Parlamentu Nasionál, maibé la iha ema ida mak representa partidu husi munisípiu ne'e iha Parlamentu Nasionál tanba ema husi munisípiu refere nia número boot ka la tama iha número asentu ne'ebé atribui ba partidu ne'e. Nune'e, JSMP hanoin di'ak atu altera lei eleitorál parlamentár no partidu politiku nian hodi uza sistema votasaun ba ema husi kada munisípiu atu bele ba tur iha Parlamentu Nasionál atu bele asegura balansu iha representasaun husi munisípiu hotu”, dehan Sra. Ana Paula Marçal, Diretora Ezekutiva.

Prokupasaun seluk mak kona-ba direitu asesu ba edukasaun ne'ebé tuir membru comunidade sira nia haree katak sei iha diskriminasaun, tanba povu ki'ik sira nia oan mezmuke matenek maibé labele kontinua estudu tanba la hetan apoiu ruma kompara ho ema boot sira nia oan. Membru comunidade sira mós preokupa protesau no promosaun ba lisan ka kultura Timor nian hanesan tebe-tebe, bidu no hatais tais iha atividade no seremonia kultural sira. Komunitade sira hato'o katak ohin lora, iha atividade ka eventu kulturál sira, ema barak la uza ona tebe-tebe, bidu no hatais tradisionál sira, maibé uza de'it dansa modernu sira.

Materia treinamentu ne'e fahe ba sesaun rua, sesaun dahuluk kona-ba sistema política ka demokrasia no sesaun daruak kona-ba sisema justisa.

Iha sesaun dahuluk ne'e, JSMP fahe informasaun kona-ba saida mak demokrasia no oinsa comunidade sira bele ezerse sira-nia direitu no partisipa livremente iha eleisaun, saida de'it mak knaar husi órgaun soberanu sira hanesa Prezidénsia Repúblika, Parlamentu Nasionál, Governu no Tribunál.

Iha sesaun daruak, JSMP fahe informasaun kona-ba direitu fundamentál sira. Alende ne'e, JSMP mós fahe informasaun kona-ba instituisaun sira iha sistema justisa nian ho sira idaidak nia knaar hanesan Tribunál, Ministériu Públiku, Defensoria Públika, Advokasia Privada no polisia.

JSMP mós informa ba comunidade sira katak knaar prinsipál husi instituisaun judisiál sira ne'e mak garantia prosesu justisa ne'ebé justu ba ema hotu iha kualkér kazu sira tantu kazu krime ka kazu sivíl iha tribunál.

Treinamentu ne'e, realiza tanba hetan apoiu finanseiru hosi Governu RDTL, lihusi Fundu Sosiedade Sivíl ka SASCAS.

Atu hetan informasaun liutan favor kontaktu direitamente:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: 3323883 | 77040735

Rua setubal, Colmera, Dili Timor Leste  
PoBox: 275  
Telefone: 3323883 | 77040735  
[www.jsmp.tl](http://www.jsmp.tl)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl